



# PRIMEIRO MINISTRO

**DISKURSU ABERTURA HUSI  
SUA EXELÊNCIA PRIMEIRU-MINISTRU  
KAY RALA XANANA GUSMÃO  
IHA OKAZIAUN REUNIAUN INTERMINISTERIÁL BA KOORDENASAUN  
HAKTUIR DEKLARASAUN HUSI PREZIDENTE ASEAN  
IHA 46.<sup>a</sup> SIMEIRA ASEAN**

Salaun Nobre, MNEK  
Díli, Timor-Leste  
16 juñu 2025



Palácio do Governo  
Avenida Marginal  
Dili, Timor-Leste

Membrus Governu,  
Ekipas técnicas husi Ministérius no Institutoens Governamentais,  
Señoras no Señores,

Ho laran haksolok boot mak ha'u hato'o ha'u-nia boas-vindas ba imi hotu iha sesaun importante ida-ne'e — primeira Reuniaun Interministeriál ba Koordenasaun — hodi husik hela liafuan balu hanesan abertura.

Reuniaun ne'e akontese iha momentu ida ne'ebé importante tebes iha ita-nia istória nasionál.

Iha 26 maiu liubá, iha 46.<sup>a</sup> Simeira ASEAN nian iha Kuala Lumpur, deside tiha ona katak sei simu Timor-Leste hanesan 11.<sup>o</sup> Estadu-Membru ASEAN iha 47.<sup>a</sup> Simeira ASEAN, ne'ebé sei halo iha outubru 2025.

Desizaun istória ne'e hanesan rezultadu husi dedikasaun, kompromisu no servisu maka'as durante tinan barak — hosi parte Governu, hosi ita-nia instituisaun sira no, liuliu, hosi povu Timor-Leste. Ne'e hanesan konkista boot ida iha ita-nia Nasaun nia moris.

Refleto mós konfiansa ho apoiu hosi ita-nia vizinhu sira hosi ASEAN ho sira-nia líder sira.

Ita iha razaun tomak atu celebra konkista ida-ne'e — maibé ita mós tenke rekonhese katak konkista ne'e marka inísiu husi período ida ne'ebé ejizente liután.

Husi agora to'o outubru, ita tenke mentein foku ho koordenasaun hodi garante katak ita hotu prontu ona atu sai 11.<sup>o</sup> membru ASEAN.

Iha 46.<sup>a</sup> Simeira ASEAN, iha Kuala Lumpur, ejize ba Timor-Leste atu kumpri pasus prosesuais nesesáriu ba adezaun no atu aselera negosiasoens kona-ba akordus ekonómikus esensiais.

Ne'e sei ejize esforsu sériu. Sei ejize uniaun, foku ho forte sentidu urjénsia.

Ha'u apela ba imi hotu — Ministrus, Vise-Ministrus, Sekretáriu Estadu ho ekipas técnicas — atu hala'o misaun ne'e ho dixiplina no determinasaun. Ita sei la tolera atrazus ou komplasénsias (katak, husik ka tolera de'it).

Ita tenke garante katak Grupu Trabalho Interministeriál ASEAN nian ne'e ho rede pontus fokais iha kada ministériu, hotu-hotu kapasitadus, iha meius, no bele servisu hamutuk.

ASEAN depozita ona nia konfiansa iha Timor-Leste — no iha ita hotu ne'ebé marka prezensa iha-ne'e. Fundamentál tebes ita onra konfiansa ne'e no hatudu katak Timor-Leste prontu atu kontribui ba ita-nia rejiaun.

Adezaun ba ASEAN la hanesan de'it objetivu ida husi polítika externa — maibé prioridade nasional ba ita-nia desenvolvimentu. Envolve setór hotu-hotu — komérsiu no investimentu, saúde ho edukasaun, oportunidades ekonómikas, seguransa, desenvolvimentu sosiál no kultura.

Ita-nia integrasaun iha ASEAN hanesan dalan ida ba ekonomia ida ne'ebé forte liu no moris di'ak liu ba ita-nia povu.

Ita sei la servisu de'it ba adezaun, maibé mós ba partisipasaun duradoura. Fiar katak ita bele sai membru ida ne'ebé akrexenta valor no tulun molda (ka, hadi'a) ita-nia rejiaun nia futuru

Hamutuk, ita bele hatudu katak Timor-Leste la prontu de'it atu adere, maibé mos determinadu atu kontribui ba pás, estabilidade, integrasaun ho prosperidade partilhada iha rejiaun.

Ha'u konta ho imi hotu-hotu atu ita bele garante susesu iha primeira Reuniaun Interministeriál Koordinasaun nian ne'e. Mai ita konkorda malu iha próximos passu konkretus hodi asegura ita-nia adezaun istória ba ASEAN.

Obrigadu barak.

Kay Rala Xanana Gusmão